

**Alle Jahre wieder: Wéi Dir jo wahrscheinlech all wësst fuere mir bei de Scouten nëtt nom Kalennerjoer, mais nom Scoutsjoer, daat s'ech um Schouljoer orientéiert. Mein Aperçu z'Joert op der Generalversammlung hat mat der Sommervakanz 2018 opgehal. Duerfir wëll ech Iech elo hei, an der nämlecher Logik, en Iwerbléck ginn, iwert d'Aktivitéiten vun eisem Grupp am Scoutsjoer 2018/2019.**

## **D'Scouts-Joer 2018/2019 bei de Guiden a Scouten St. Martin Duelem**

- Daat neit Scoutsjoer giong, wéi gewinnt un mam **LGS-Kongress** deem eis dest Joer **Mettwochs den 19te September 2018** op Réimech geféiert huet. Nieft den üblechen Positiounen wéi Réckbléck, Ausbléck, Konten a Budget huet dest Joer een Thema fir vill Diskussiounen gesuergt. En neie Verspriecheustext sollt deem Daag gestëmmt gin, deem en direkte Besuch op Gott sollt aus deser Formule erausstreichen, an esou dem Zaitgeescht an de virun 2 Joer verännerte Statuten Rechnung sollt droen. Aus deem vote gouf allerdéngs deem Owend naischt, well awer zevill Oppositoun ze spieren war, a well e puer Leit direkt Amendementer fir deem Text eragin haten. Esou gouf sech an deem Punkt op e spéidere Cheffdag vertagt.
- Fir Sondes den 23te September huet de Steve eng kleng Delegatioun vun Duelemer Cheffen ugeféiert, déi fir de **Cheffdag 2018** op Réimech komm waren. Et war alt nees eng Veranstaltung déi vill Onzefriddenheet bei eise Cheffen hannerlooss huet, well keen wirklech vill Verwertbares dovugedroen hat. Mais de Verband huet angeblech de Malaise erkannt, an ab 2019 soll eng nei Formule vu Cheffdag, kombinéiert mam Kanudag, also eisem Recyclagedag, nees fir méih Zefriddenheet an de Reihen vun den LGS-Cheffen suergen. Demno, affaire à suivre!
- Méih konstruktiv ass et dunn den nächste Samsdeg 29te September 2018 ginn, wou mir Duelemer Guiden a Scouten nees op eisen alljährechen **Schnupperdag** invitéiert haten. Flott Spiller an Aktivitéiten waren fir nei an al Kanner am Alter fir eis Biber a Wellefcher organiséiert gin, an eng Kaffisstuff mat Eisekuch a Gedréngs huet och d'Elteren iwerdeems bei Laun gehalten. Um Enn haten besonnesch eis Bibercheffen en zefriddene Gesichtsausdrock, well hir Branche war elo esou zahlreich wéi nach nie. Daat war jo richtig gudd, well nëmmen esou ass e permanente Renouveau vun eise Branchen vun ënnen no uewen garantéiert.
- De WE drop den 7. Oktober 2018 war **Comémoratiounsdaag**, a bei eis zu Duelem huet e speziellen Szenario stattfonnt. Fir d'éischt war zu Duelem Mass, an duerno ass e Cortège forméiert gin, fir zur Gedenkzeremonie vun der Gemeng bis nees virun d'Kiirch ze goen. Op alle Fall ware mir Scouten, mat Fändel an an Uniform bei deenen 2 Deeler présent.
- An du war et Zeit den alljähreche Montéeskarussell nees dréien ze loos. D'Montée ass de Wiessel vun engem Scout, deem fir seng Branche ze aal gin ass, an déi nächst héijer Alterstuf. Gewéinlech gett daat mat enger klenger Aventure an enger Feier kombinéiert. Um Enn kritt de Scout deem d'Montée gemacht huet, da feierlech de Foullard an de Farwen vu senger neier Branche iwerreecht. Esou war Samsdes den 20ten Oktober 2018 dann d' **Montée vun de Biber bei d'Wëllef**.

- Um SchlussWe vun der Allerhellegevakanz hu sech dunn eis **Avex** den 3.-4. November 2018 zu Ohn an de Chalet vun de Wuermer Scouten agenistet, fir an engem **Montées WE**, nei Scouten aus de Wëllef an hire Reihen opzehuelen. Trotz der Tatsaach, dass och nach e puer Leit aus den Avex dësen Hierscht an d'Carapio erop gewiesselt haten, war no dëser Montée den Effektif bei den Avex nees op engem méih gesonde Stand vun 10 Kanner ukomm, no engem Déifstand vun 4 Kanner um Enn vun der viireschter Saison.
- Eis **Carapio** hun e rasante Start an déi nei Saison geholt. Sie hun vum 3.11-4.11.2018 hiert Scoutsjoer mat engem **Spill a Spass WE zu Monerech** ugefang.
- Nodeems mir jo 2017 **Mäertensdag** nees ganz grouss no baussen gefeiert haten, war turnusgeméiss fir 2018 méih eng bescheiden Editioun ugesoot. Mais ganz ouni Extraprogramm konnte mir dësen Daag jo nett laanscht goen loossen. Esou hun Samsdegs den 10ten November fir d'éischt Biber a Wëllef zu 27 Kanner an enger Reih Cheffen am Home mat Veillé, Lanterebastelen, Sängen, Schoky a Kuchemännercher e schéinen a léierreichen Nomëtteg mat Bléck op den hellege Mäerten zoubruecht. Fir Owends haten sech dunn déi méih grouss, vun Avex bis zur Amicale RV am Home ginn, fir zesummen eng gudd Trapperkichen ze genéissen an mat engem wëssenschaftlech recherchéierte Dokufilm sech méih déif op den historesche Personnage vun eisem Patréiner a Viirbild anzeloossen.
- Vum 10-11. November 2018 war dun och Montée no ganz uewen. Eng Reih Guiden waren aus den Carapio-Schlappen etnwues a sollten bei d'Raro opgehollt gin. Op hirem **Raro-Montee Weekend** hu sie, bei Sauwierder e.a. e Fotorally durch d'Stadt gemacht.
- An dunn huet déi heemlech Kreschtdaagszeit schon, mam dem kommenden Advent vu sech schwätze geden. A wien seet Advent, seet **Adventskräentz**, an esou huet ab der lëschter Novemberwoch sech eisen Home nees an eng kleng Adventskranzfabrik verwandelt. Donnegdes den 29ten November hun eng Reih fleisseg Leit ronderem d'Isabelle van Mulders déi éischt Kräntz fäerdeg gemacht, déi nach virum WE musste geliwwert ginn. A Samsdegs den 1ten Dezember 2018 sinn dunn d'Scouten och dobeikomm fir eng grouss Commande vun iwert 100 Kräntz fäedeg ze maachen. All Kand konnt dobei op mannst dee Krantz selwer maachen, deen fir seng Famill bestallt war, a fir Mëtteg hate mir all eist Material verschafft, an eis Arbecht erledegt. Eise Kessier huet sech iwert en gudd Batz Geld gefreet, deen iwert dëse Wee an eis Kees komm ass.
- An direkt den nächsten Daag goug et a Saachen Advent nees weider. Zu Fëlschdreff waar, wéi all Joer, nees **d'Porte ouverte beim Buttek Mosaik**. Eng Reih Frënn aus eise Cheffreihen hun et sech zur Eier gemacht, hei all Joers mat engem klengen Beitrag zum groussen Gesamten beizetroen. Fir de Vegetarier eng Alternativ ze loossen a gleichzeiteg mol eppes anescht wéi Gromperekichelcher ze maachen, hate mir dëst Joer Käsespäetzle op de Menu gesaat. An den Erfolleg huet eis Recht gin. Owends ware mir Alles lass ginn a konnten midd, awer zefridden apaken am Bewosstsinn, am Viirfeld vu Krëschtidaag eppes Gemeinsames a Guddes gemacht ze hun. Elo konnt Kreschtdaag kommen.
- Freides de 7. Dezember 2018 sin eis **Carapio** (3 chef an 4 pioen). mat der Regionalequipe Zentrum op Peiteng op e **Keelentournoie** gangen. Do hu sie esou gudd matgespillt, dass den Duelemer Grupp op déi gudd 2te Plaz komm ass.
- Samsdes den 8ten Dezember 2018 huet et am Home nomëttes an der Wëllefchersversammlung ganz weihnachtlech gericht. Eis **Wëllefcher** haten den Home an eng Weihnachtsbäckerei verwandelt. Zesummen mat hire Cheffen hu sie hei déi

**Kichelcher** gebaak, déi mir op helleg Owend op eisem Tour mam Friddenslicht an no der Metten verschenke wollten.

- Dëschdes den 11ten Dezember 2018 hun **d'Albatrossen** mol nees vu sech héieren gelooss. Fir deen Owend haten sie sech an der Stadt um **Krëschtmaart** RV ginn, fir zesummen déi vill Luuchten, Iessspezialitéiten a flësseg Leckereien ze genéissen. Et war e flotten Owend!
- Donnegdes den 13ten Dezember si mir mat 32 Memberen a Frënn an **d'Coque** gefuer, fir do bei der **Notp 2018** beim Catering ze hëllefen, an nieft dem Gratiskonzert, och nach eiser Keess e klenge Subside ze verschafen.
- Am Dezember 2018 waren och eis **RaRo** a Sachen Krëschtdaag ënnerwe. Zesummen ware sie an der Stadt um Chrëschtmaart. Do sinn si anscheinend op de Gout vun de Krëschttagskichelcher komm. Fir déi Geloscht ze stëllen sinn an enger nächster Versammlung der Kichelcher geback gin. A dunn hu sie se zur Secherheet awer all selwer geschmaacht. Sie wollten jo kengem e schlechte Kichelchen ginn. Dommerweis waren dun guer keng méih iwreg.
- Vum 18ten bis den 23 Dezember inclus soutzen all Dag mindestens 2 vun eise Carapio beim **AS -Adventure** an der Entrée fir de Client'en d'Cadeauen anzepaken, an esou sech eng kleng Mouk unzespueren, fir hir Partizipatioun um Weltjamboree an Amerika am nächste Summer ze subventionnéieren.
- Der Mensch liebt die Abwechslung, esou heescht et jo. Duerfir wollte mir dest Joer a Punkto **Krëschtfeier** am Grupp och emol aner Wee'er goen. Aus deem Grond hate mir op eng classesch Feier am Home verzicht. Amplatz vum gewinnene Schéma mat Veillée, Gesank, Cadeau an Iessen am Home, wollte mir eis mam ganze Grupp un der **Friddenslichtfeier** vun der **EAS** bedeelegen, déi dest Joer zu Rodange ausgeriicht gouf. Mat engem Extra-Bus si mir Samsdeg den **22ten Dezember 2018** nomëttes mat iwert 30 Leit op Rodange gefuer. Altersspezifesch Aktivitéiten zum Thema Fridde, eng Veillée an der Kiirch, e Fakelzuch zeréck bei den Home zu Rodange an eng gemeinsam Agape hun eis de ganze Mëtteg iwer méih oder manner beschäftegt. An zum Schluss, jhust éih mir heemgefuer sinn, ass eis agefall: hoppla do war dach nach Eppes. Waat wollte mir scho méih nach mathuelen? Richteg!! D'Friddenslicht vu Betlehem. Daat stoung onscheinbar um RCH am Home, no der Devise: selbst ist der Mann. Daat war eigentlech schued, datt esou ee staarkt Symbol, daat jo nett zoufällig grad zu Betlehem an der Gebuertskirche ugefang gett, esou niewesächlech behandelt gin ass. Wéi weihevoll waren dach déi Verdeelungsfeieren mat Aussendung vu fréieren Zeiten. Mais nuje, elo hate mir déi begiirte Flaam zu Duelem, a mir konnten domat weidermaachen wéi mir wollten.
- An daat sollt ganz séier kommen. Nëmme 2 Deeg méih spët war schon **helleg Owend**. Fir Mettes um 2 hate mir eis am Home RV ginn, fir mam Friddenslicht, engem klengen schrëftleche Bonjour an e puer selwergebake Kichelcher op den Tour ze goen, fir alen, kranken oder soss rezeptive Mënschen aus eisen Dierfer, mat eisem Besuch an deene klenge Cadeauen, e Moment vun Opmierksamkeit an Hoffnung ze schenken. Traditionellerweis starte mir eisen Tour zu Syren um Graaf vun eisem verstuerwene Frënd dem Sébastien Machtelincx. Dest Joer ware mir zahlreich genuch fir kënnen a 4 Gruppen auszeschwärmen an esou entsprechend méih Haiser ze errechen. An daat opwuel eng Reih vun eise Wëllefcher nett matkonnten, well sie an der Prouf fir d'Krëppespill mam Stephie an der Duelemer Kiirch waren.
- Knapps ware mir kurz virun der Metten zu Duelem zeréck, dunn housch et séier nach eise klenge Stand virun der Duelemer Kiirch opzeriichten an alles viirzebereeden, fir de

Leit no der Mass, nieft engem klengen Glieschen mat enger Käerz mam Friddenslicht, nach e Glas Glühwein oder Schoky an e puer Kreschtdagskichelcher unzebidden. Esou konnte mir dann, nodeems mir d'Geburt vun eisem Erléiser Jesus Christus an der Mass gefeiert haten, nach e wéineg an der Krëscht dagsfreed zesummen verbréngen. Et ass e klengen, harde Kär vu léiwe Leit, déi et sech nett huele loossen, dëss Aktioun als Dingscht un eiser Paar duerchzezéien. Ech soen hinnen vu ganzem Häerz en décke Merci duerfir! Dest Joer sinn och emol Leit mat enger brennender Käerz doheem ukomm, well anescht wéi déi meeschte Joeren huet et 2018 op helleg Owend nett gestiihrt! Nodeems dunn eist Material nees ordentlech am Home verstaut war, konnten och mir Cheffen, midd, awer frouh am Häerz, heemfueren, fir an eise Familljen weiderzefeieren.

- Fir Dëschdes den 22. Januar 2019 hu mir eis satzungsgeméis nees no baussen opgemaakt. An eiser **Generalversammlung 2019** hu mir vis-à-vis vun de Gemengenautoritéiten, eise Memberen an all Mënsch deen et wollt wëssen, d'Kaarten op den Dësch geluecht an en détailléierten Abléck an eis Aktivitéiten an an eis Finanzen ginn.
- Fir de **Bietdag 2019** an eiser Poor St. Nicolas haten déi Responsabel mol nei Iddien lancéiert. Mat klengen awer rengen Delegatiounen ware mir Duelemer Guiden a Scouten bei verschiddenen Gebietsmomenter dobei. Esou ware mir Samsdes den 9te Februar 2019 zu Waldbriedemes beim Taizégebied présent, an den nächsten Daag si mir, mat 6 Leit am schloo Reen zu Fouss vu Welfréng op Réimech gepilgert fir do d' Mass zum Ofschloss vum Bietdag matzefeieren.
- Freides den 1te Mäerz 2019 waren e puer Leit aus eisem Grupp am Festsall vum Athenäum dobei, wou eise Verband eng **séance académique zur Feier vun 100 Joer LGS** ausgeriicht hat. Eise Cheffscout, de Grand-Duc Jean war nach mat sichtbarer Freed an eiser Mëtt dobei, an huet matgelaacht a matgefeiert. Keen huet geduecht, datt et sei läschten Optrëtt bei senge Scouten sollt sinn.
- Samsdes den 16te Mäerz 2019 war, am bewährten 2-Joerestakt emol nees **Scoutsteater** zu Duelem op der Affiche. Eis Biber waren do ze gesinn mat dem Stéck: *De Raup dee Lächer mëcht*. Eis Wëllefcher hun d'Leit amuséiert mat hirem Kaffehausketch: *am Duerfcafé*. D'Avex hun eis mat hirem Reportagetheater ënnert dem Titel: *Fake News*, mat hannert d'Kulissen vum TV-news-business gehollt. An eis Carapio woussten schlussendlech de Publikum mam Stéck: *de Monni Nepomuk* ze begeeschteren. Dobei waren insgesamt 71 Kanner a Jugendlech a méih oder manner grouse Rollen op der Bühn, encadréiert, vun insgesamt 21 opgereegte Cheffen als Maquilleuren, Flüsterer a Coachen. Wann een dann nach all déi fleisseg Hänn aus de RaRo, der Amicale an den Albatrossen dobei rechent, déi ronderem a Keess, Tombola, Buvette an Accueil gehollef hun, da weist et sech, dass fir eis Entreprise Teater, em déi 120 Leit zesummengeschafft hun, fir dese Projet ze réalisieren.
- Drei Deeg drop ware mir schon nees zu vill Leit am Home zesummen. Dëschdes den 19te Mäerz 2019 hu mir mat enger leckerer Grillade den **Erfolleg vun eisem Teater**, an den **26te Gebuertsdag** vun eisem Guiden a Scoutsgrupp gefeiert.
- Donnegdes den 21te Mäerz, op Fréijoersufank, haat eise Gruppcheff d'Force Vives vum Grupp bei sech op Lentgen invitéiert, fir do am méih enke Krees wéi en normale Grupperoot, eng intensiv **Planungsronn zur Viirbereedung vun der nächster Scoutsfirmes** ofzehalen. Wann een eise Frënd de Steve kennt, wees, een, datt daat nett ouni e gudde Maufel ze Iessen ofgangen ass.
- Och 2019 waren déi Duelemer nees beim **Iron-Scout** dobei. Daat ass eng Aventure, bei der jonk Leit aus de Carapio probéieren hir kirperlech Grenzen ze sichen an ze

iwerrannen. A 24 Stonnen sinn dobei eng 65 km Foussmarsch ze bewältegen. Teschend dem 29. an dem 31.3 sin aus eise Carapio 3 Chef an 2 Pioen op Rodange um Ironscout matgangen. Dobei ass den Henry Wetzel 27km, de Max Steichen an den Yanik Leclerc 65km gangen. Daat soll emol een hinnen nomachen!! Duelem war alt nees am Spëtzepeloton dobei.

- Donnegdes de 4ten Abrell owends hate mir e **Kannerkreizwee** an der Duelemer Kiirch um Programm. Et waren zwar nëmmen wéineg Biber a Wëllefcher do, awer déi waren mat vill Asatz mat hiren Täscheluuchten dobei fir de schéine Kraizwee an der Duelemer Kiirch méih genau ze hannerfroen..
- De 6ten Abrell waren eis Carapio alt schon nees um Dill. Eng kleng Equipe vun 3 Leit hat sech op de Wee op Miersch gemacht, fir do um **Jocapi**, der Journée Carapio, deelzehuelen. Dest ass en nationalen Treff vun der Carapiosbranche, déi a Form vun engem Rally all Joers vum vainqueur vum Joer virdrun ausgeriicht gett. Eis kleng, awer fein Equipe huet hei déi remarquabel 2. Platz gemacht. Duelem wat alt nees ganz viir bei, a muss awer jhust nett 2020 de Jocapi ausriichten. ☺
- Op Kaarfreideg den 19ten Abrell mëttes ware mir nach eemol a Saachen Kraizwee am Asatz. Zesummen mam Stephie hate mir e **Kanner a Jugendkraizwee** vu Felschdreff op Duelem organiséiert deen och fir Nett-Scouten op war, an un deem sech erfreetlech vill Jonker och aus eise Reihen bedeelegt hun. D'Michèle Hilger vun der der Equipe Animation Spirituelle beim Verband ass eis besiche komm, an huet eise Kraizwee matgemaacht. Den Ofschloss huet dëse Wee am Home fonnt, wouhin mir all Mënsch op e klenge Faaschteniessen a Form vu Bouillon an engem grouse Saueredeegebrout invitéiert haten.
- Dëschdes den 23ten Abrell koum dunn déi traureg Nooricht, déi sech an de lëschten Deeg schon ofgezeechent hat: eise **Chefscout** de Grand-Duc Jean war am Alter vu 95 Joer **gestuerwen**.
- Den Samsdeg drop, den 27ten Abrell hu mir eis mat 26 Scouten un der **Grousser Botz** an der Gemeng Duelem bedeelegt. Bei sabbelegem Wieder hu mir matgeholf, d'Gewaan fir d'Fréijoer propper ze maachen. Mat engem separate Stousstrupp si mir ouni offiziellen Opdrag, och nach op d'Wisen bei eisem Home gezunn, fir och hei d'Spuren vun der mënschlecher Iwerhiefflechkeet ze beseitegen. Duerno hu mir eis d'Grillade, déi d'Gemeng offeréiert haat, och gudd schmaache gelooss.
- Mais domat war deen Daag nach guer nett fäerdeg waat d'Scouten ugeet. Fir Owends hate mir eis an der neier Schoul zu Fëlschdref aquartéiert, fir mat der Chefféquippe, eiser Amicale an allen déi eis op der viirechter Kirmes geholfen haten, eis traditionelle **Agape** ze deelen. Daat war dess Kéier nees ënnert Form vun enger **Weinfondue** déi eis all gudd geschmaacht huet.
- 2019 war nees e grousst Joer fir den internationale Scoutismus. Et war nees e **Weltjamboree** ugekënnegt. Dess Kéier an de Vereenegte Staaten vun Amerika. E puer vun eise Carapio haten sech gemellt, fir bei dësem groussen Scoutsevent mat dem letzebuenger Kontingent matzegoen. Mais esou eng Entreprise wëllt viirbereed sinn. Fir datt d'letzebuenger Participant'en sech sollte kenneléieren an vir déi ganz Saach ordentlech viirzubereeden war vum 27. op den 28. Abrell e **PräparatiounsWE** um Neihaischen. Kloer dass déi Duelemer Delegation och do derbei war.
- Op den 1te Mee 2019 huet eis laangjäreg **Kooperatioun mat der Coque**, waat eisen Asatz am Catering bei hire Manifestatiounen ugeet, op eis Initiative en Enn fonnt. Deen domat verbonnene Stress wäert kee vermëssen, jhust d'Ewechfalen vun deem domat

verbonnenen Apport fir eis Kees musse mir irgendwéi opgefange kréien. Daat wäert d'Zukunft weisen.

- Den nächste Samsdeg, de 4te Mee stoung ënnert engem trauregen Thema. De **Chefscout sollt begruewe** ginn. Kloer dass all Letzebuerger Scoutsverbänn mobil gemacht hun, fir hirem beléiften a laangjährege Cheff déi läscht Eier ze erweisen. Scho ganz fréih hu sech grouss Scoutskontingenter vun all Alter, vun 3 Plaatzen aus op de Wee an d'Uewerstadt gemacht, wou sie sech op dem Dreieck vun der Bastioun Beck fir eng Scoutsméisseg cérémonie d'adieu zesummefonnt hun. Duerno gouf et richtig feierlech, well eng 240 lëtzebuerger Guiden a Scouten aus alle Verbänn, zesummen **mat der Arméi sollten Spaléier stoen** um Wee vun der Lued a vun den offiziellen Trauergäsch. Fir déi 6 Leit aus eisem Grupp (*Nathalie Bricher, Carlo Kaufmann, Jona Karmeyer, Rafi Pinto, Julie Van Mulders, Martine Welter*) déi d'Eier haten an der Uniform am Spaléier matzestoen, war et, trotz der batterer Keelt, en ergréifend Erleefness, daat sie all mat Stolz a Genugtuung erfüllt huet. Sie hun e Stéck lëtzebuerger Geschicht an och Scoutsgeschicht hautno materlieft.
- Eng Woch méih spéit war schon déi nächst lass bei de Scouten. Samsdes den 11te Mee 2019 Owends hate mir alle Guiden a Scouten ab Avex RV gin fir de **Pélé des Jeunes**, mat deem tradiounsgeméiss d'Muttergottesoktave an der Stadt ugang ass. Eng gemeinsam Raclette huet eis kierperlech souweit gestärkt, dass mir de Strapazen vun Veillée, Karaoke, an 22 km Foussmarsch duerch d'Nuecht konnte Stand halen. Ennerwee hu mir nach en Abstecher bei d'Skulptur vun der Regina Pacis gemacht. Dess liewensgrouss Skulptur vun der Muttergottes steet zanter 1939 ganz einsam am Bësch iwert der Millen zu Syren. Hei hui mir eng Lanter an d'Ziedel mat eisen Ulées fir eise Pilgergang bei der Muttergottes hannerloos, a sinn weider duerch d'Nuecht a Richtung Kathedral gang. No der Pélés'mass hu mir zesummen um Mäertchen Kaffi gedronk an e kurzen Tour iwert de Knuedler gemacht, éih d'Elteren hir Kanner agesammelt hun an och mir Cheffen heem ënnert den Diwwi de fehlende Schlof nohuelen gang sinn.
- Samsdes de 25ten Mee 2019 um Enn vun der Oktave, war dun och nach un déi kleng Scouten geduecht ginn. Deen Mëtteg haten sie RV an der Kathedral fir d'**Biber a Wellefchersandacht 2019**. A mengen A'en eng ganz wichteg Aktivitéit am Manifestatiounskalenner vun de klenge Branchen. Op déi Manéier kréien sie och d'Chance, vu Kandheet un déi grouss national Traditioun vun der Muttergottesoktave ze erliewen an no bruecht ze kréien.
- A schon huet den nächste groussen gemeinsame Projet vun eisem Grupp eis an Otem gehalen. Eis **Scoutskirmes Editioun 2019** stoung virun der Diir.
- Schon eng gudd 10 Deeg virdrun, haten eis **Raro** nees d'Charge iwerholt, fir eis Panneau'en laanscht d'Stroossen opzestellen, fir der Welt matzedeelen, dass elo geschwenn zu Duelem bei de Scouten nees Kirmes wier.
- Vu Méindes dem 27te Mee un, hun e puer Cheffen an Albatrosse ugefang, eng hëlzen Entréespaart op d'Wiss ze bauen, fir datt de Kader fir d'Kirmes richtig scoutsméisseg géif ausgesinn. An dunn goung et Schlag op Schlag. Densches owends goufen, mat ville fleissegen Hänn d'Bühn an déi grouss Zelter opgeriicht, an déi 8. international **Scoutssummerraclette** vun den Albatrossen ass op der Scoutsbühn spéit owends zervéiert gin. De ganze Mëttwoch den 29te Mee 2019 gouf weider fleisseg opgeriicht a viirbereed, a pënktelech fir 20:00 Auer huet dun **d'Kirmesstrépp** eis Kirmes och musikalesch opgemaakt. Donnegdes den 30te Mee goung et mat der **Kirmesmass** op Christihimmelfahrt lass, déi mir Scouten musikalesch an och soss encadréiert hun. Duerno ass et weider gang mat dem Concert-Apéritif vun **der Formatoun StereU**, mat

**Mettegiessen, Spiller** vun a viir d'Kanner, dem **Kouhscheisspill** an eise schon bal traditionnellem **Volley-Ball-Tournéier** op der Scoutswiss, bei deem och dest Joer nees heroesch Matcher gespillt goufen. An owends hate mir zu eiser grousser Zefriddenheet, schon nees bal all grousst Material agepaakt ier et e kuerze Schluet gin huet. Esou blouf fir den Daag drop nëmmen nach gemittlech eis Iess-Räschter am Krees vun enger grousser Schar vun Memberen ze verdillegen, an den Home an d'Wiss nees an en ordentlechen Zoustand ze versetzen. Ech sinn all Joers nees nei erstaunt a begléckt ze gesinn, wéi vill Asatz aus eise Reihen och dann nach do ass, a wéi séier am Fong deen Riesenbagage nees verschwonn ass, deen mir all Joer fir d'Scoutskirmes zesummendroen an opriichten. Elo konnt den harden Deel vun der Duelemer Scoutsszene sech RV ginn fir owends zu Fréiséng am Restaurant zesummen den Erfolleg vun der Editioun 2019 ze feiern, an daat groussardegt Gefill ze genéissen, zesummen mat gudde Frënn, sech fir eng grouss a wertvoll Cause middgemacht ze hun.

- Vum 8., bis den 10. Juni war 1 vun eise Carapio-Cheffen mat der **Carapio** Regionalequipe op de **Paischtweekend op Bredene**.
- Als nächst koum Paischten, an hei haten mir dest Joer emol nees e RV mat enger aler Lëtzebuurger Traditioun, **der Iechternacher Sprangprozessioun** op Paischtdenschdeg. Eng kleng Grupp vun 8 Scouten hu sech Méindes den 10te Juni 2019 nomëttes getraff, fir zesummen op Irrel an Daitchland vis-à-vis vun Iechternach ze fueren. Hei hu sie bis owends Geocachen gemaacht an e ganze Parcours ronderem e Kriminalfall duerch d'Bescher a Fielsen gemaacht. Um Enn hate sie de Fall geléist, an den Täter ermëttelt. No engem décke Wieder hun sie sech dunn zu Berdorf an enger Hiel; der Huellay zur Nuecht ageriicht. No Nuetiessen, Gesangsveillée an enger kurzer Nuecht an der Hiel sinn sie, ab 5:00 moies, um Dill gewiercht, fir déi 7km Marsch duerch de Bësch op Iechternach ze maachen. Schwéier bedréckt huet dobei eis Avex, dass sie deen Daag nett konnten an der Schoul sinn, well sie jo fir d'Sprangprozessioun freigestallt waren. Jhust in time koume sie zu Iechternach un fir d'Mass virun der Prozessioun. Nom Kaffidrénken giong et dunn bei herrlechem Wieder mat dausende Leit, a musikalesch enkadréiert vun engem eegene Grupp Musikanten a Scoutsuniform, mat der Spréngergrupp vun den LGS hopsend duerch Iechternach an zum Schluss laanscht Graaf vum hellege Willibrord. Fir dese sportlechen Exercice war eisen Duelemer Spréngergrupp nach verstärkt gin vun eise Frënn dem José an dem Jang, déi zur Sprangprozessioun bei eis gestouss waren. Bieden mat de Féiss, wéi daat bei der Sprangprozessioun de Fall ass, geet stark un d'Substanz. Gudd midd giong et op e gemeinsam Mettegiessen, waat d'EAS vun eise Verband zu Iechternach organiséiert hat. Nomëttes ass den Duelemer Sprangexpeditionskorps du schlieslech um Heemwee nach op Réimech gefuer, fir do bei enger gemeinsamer Partie Minigolf dëss flott Entreprise ze beschléissen.
- Donnegdes den 20te Juni huet sech eng gréisser Gesellschaft vu Cheffen, Amicale an Albatrossen mat eise Abbé Jey beim Lisi zu Felschdreff getraff, fir emol nees Eppes zesummen ze iessen. Mais dëss Kéier war daat nëmmen aus wëssenschaftleche Grënn dass mir zu 16 Leit en **10 Gang-Menu** musste bewältegen. Et ware Plat'en aus engem **indesche Menu**, déi vu verschiddene Leit, dorënner och dem Paschtouer, gekacht a matbruecht goufen, an dann beim Lisi zu engem Menu kombinéiert goufen. Zweck vun der Übung war, eis indesche Kachkünste ze testen, fir éischtens en indesche Plat ze bestëmmen, deen mir am Hierscht bei der Mäertensfeier 2019, kéinten eise Gäscht offeréieren. An, zweetens sollt dësen Test eis den néidege Courage ginn, fir eis ze

engagéieren, am Mäerz 2020 en indescht Benefiz-Iessen op d'Been ze stellen, mat deem mir dem Abbé Jey seng Hëllefprojete an Indien wellen ënnerstëtzen.

- A wou mir schons déi 7 Partizipant'en um desjähregen Deel vum Wee op Santiago de Compostella zesummen haten, ass spéit owends och nach eng **Open-air Filmviirféierung zum Camino del Norte** beim Lisi am Gaart gelaaf, mat uschléissender Diskussioun iwert déi läscht oppe Fro'en zu dem Projet. Esou war deen Daag wirklech gudd ausgenotzt.
- Samsdes den 22te Juni 2019 ware mir, mat eisem Fändel der Invitatioun vun den Duelemer Gemengenautoritéiten gefollegt, a sou ware mir eng grouss Delegatioun an de gréngen Hiermer bei der Feier vum **Te Deum** owends virum National Feiertag 2019.
- Sondes den 29ten Juni 2019 hat déi national Biberéquipe op de **Bibertreff 2019** op Klierf invitéiert. Do duerften déi Duelemer Biber jo nett fehlen. Moies goug et mam Zuch Richtung Klierf. Et sollt e flotten a warmen Daag ginn. All d'Biber hun zu Klierf also um Planéit Klierf nom Rudi am Weltall musse sichen well deen ofgestierzt war. D'Biber hu sech also op de Wee gemach an sin vu Planéit zu Planéit gereest wou sie vill flott Spiller gemach hun. Schlussendlech hat de Rudi, dank der Hëllef vun de Biber, nees Sprit fir seng Rakéit a konnt nees glécklech op de Planéit Klierf zeréckfléien.
- Den 30.6 sin eis **Carapio** mat 3 Chefen an 3 Scouten zu Housen an den **EscapeRoom** vun den Husener Scouten agespaart ginn. Leider hun sie et awer net a 60 min gepackt, selwer do nees erauszekommen. Mais déi Scoutsfrënn aus dem héigen Noden hun sie trotzdem nees erausgeloss. A Spass hat et awer gemacht..
- Dëschdes den 9te Juli hat de Steve d'Chefféquipe fir de **läschte Grupperot vun der Saison 2018/2019** owends an den Home geruff. Dat ass all Joers de flottste Grupperot, well zum engen, sou kurz virum Enn vum Scoutsjoer, gewéinlech keng grouss Diskussiounspunkten meih um ordre du jour stinn. Zum aneren feiere mir an dëser Réunioun och ëmmer eisem Frënd a Gruppechef sein Gebuertsdag mat enger Grillade an engem gudde Patt op déi eis de Steve och dest Joer ness sympatescherweis invitéiert hat.
- An schon war d'Zeit vun de **Summercamp'en**, dem Héichpunkt vun all Scouts joer do!
- Vum 15. bis de 25 Juli 2019 huet et eis **Avex** op eng flott Campplatz an Däitschland verschloen. Ennert dem Thema „ **Together 2019**“ hu sie hir Zelter am Honsreck um Zeltplatz Kapellenwiese an der Gemeng Oberthal no beim Bostalsee opgeschloen. Well déi Nideranvener Avex keen TC mat gültiger Ernennung haten, an duerfir eléng keen Summercamp maache konnten, haten sie sech eisen Duelemer Avex ugeschloss. Op enger wonnerschéiner Campplatz, matten an der Natur waren all Viraussetzungen erfüllt fir e flotte Camp. Besonnesch den Hike mat Iwernuechten an enger aaler Ruin war top. An awer goufen et Reiwereien tëschend de Cheféquppen vun deenen 2 Truppen. De Moosstab an d'Usprech vun der Chefféquipe un e Summercamp sinn nett an all Trupp déi selwecht. Wéi schon 2001 an 2003 huet sech d'Expéienz, fir mat engem anere Grupp zesummenzagoen och 2019 nett bewährt. Eis Kanner haten e flotte Camp a waren zefridden, mais eis Cheffen hu vill misste kompenséieren.
- Vum 16-19ten Juli 2019 waren eis **Biber** um **Yakari Summercamp** um Neihaisgen. Thema hei war d'Liewen vun den Indianer. Et gouf e ganz flotten an amüsante Camp deen de Kanner ganz gudd gefall huet. Fir déi kleng Biber war et eng ganz nei Erfahrung fir an Zelter ze schlofen. Eng Nuecht konnte sie esouguer an engem richtegen Indianer-Tippi schloofen. Eis Biber hu 4 Deeg Spill, Spass a Freed erlieft um Yakari an hun villes iwuer Indianerliewen geléiert. Midd awer zefriddeen goug et dun Donnegdes den 19te Juli nees heem.



- Nodeems d'Biber den Neihaisgen geraumt haten, goug et do an déi 2. Ronn. Vum 21.-26. Juli hun sech dunn eng Retsch Wëllefchersmeuten fir de **Summercamp Yakari** installéiert. Dobei waren och eis Duelemer **Wëllefcher**. Grad wéi d'Biber virun hinnen, hun och sie e flotte Camp ronderem den Thema Indianer erlieft, deen sie mat neien Erfahrungen a vill froue Momenter beschenkt huet.
- Well eis **RaRo** dest Joer keen Summercamp konnten op d'Been stellen, hu sie d'Saison kurz virun der Vakanz mat enger gemeinsamer **Grillade** beim Lagerfeier op der Scoutswiss gemütlech zu Enn bruecht.
- An dun war och fir eis Carapio de langerwartenen Daag do. Vum 20. Juli bis den 3ten August waren 2 Chef a 4 Pioen vum Duelemer Grupp mat op de **24ten Welt-Jamboree** an de Summit Bechtel Resort a West Virginia USA. Ennert dem Thema **Unlock a New World**. sinn hei méih wéi 40.000 Scouten a Cheffen aus 152 Natiounen zesummenkomm, fir matten an der Natur, praktesch geliefte Friddenserzéiung auszuprobéieren. Technesch war hei alles ganz grosses Kino, an déi Internationalitéit war schon en Erlebens fir eis jonk Leit. A Punkto Iessen an Nohaltegkeet, mussen se an de States awer anscheinend nach beiléieren. Recyclage ass e grousst, awer eidelt Wuert do. Duerfir sinn eis Scouten awer ganz no op Tuchföhlung mat der Natur an hire Bewunner komm. Souweit, dass eng Kéier e Bier, deen sech bis bei d'Zelter veriirt hat, huet missen betäubt an oftransportéiert gin. No Schweden 2011 a Japan 2015 war dest den 3te Weltjamboree, bei deem Jonker aus eisem Grupp dobei waren. Déi Duelemer waren alt nees dobei, si ginn sou lues zum Global Player. Daat ass eng gudd Saach, well esou en Jamboree den Héichpunkt vun enger Scoutscarrière soll sinn, an déi jonk Leit, déi daat erliewe kënnen, bestëmmt fir hir't Liewen prägt mat dem BP sengem Geescht vun Brüdelerleechkeet an Naturverbonnenheet. A schlieslech sinn nach 1 Chef an 1 Pio aus eise Reihen bis den 10.8 mat op d'Noorees durch d'USA matgangen
- Wéi daat meescht Material vun de Branchene hire Summercamp'en schon nees agepaakt war hu sech Samsdes den 3ten August moies fréih um 4:00 Auer 5 Leit beim Home RV ginn, fir den Unhänger unzeträmen, a mam Rosch Manuel a Richtung San Sébastien an Nordspunien ze starten. Eise gudden Abbé Jey hat drop gehalen och esou fréih opzestoen, fir eis mat engem kurze Gebiet an dem Härgott sengem Segen an d'Nuecht ze entloossen. D'José an den Jean waren schon virun mam Zuch op d'Rees gang, an owends hu mir eis all um Camping zu San Sébastien eremfonnt. Déi nächst 6 Deeg hun eis eng 130 km um **Camino del Norte** duerch déi well romantesch baskesch Biergwelt direkt virum Atlantik geféiert. Obwuel de Wee duerch d'Bierger an der Augustsonn kierperlech ganz ustrengend war, huet eis dem Monique seng Kachkonscht, déi wonnerschöin Landschaft an d'Magie vum eelste Jakobswee Kraaft ginn, och d'Etappe 2019 gudd ze meeschteren. No 1.350 km Wee vun Duelem aus si mir elo nach offiziell 711km vu Santiago de Compostella fort. Domat waerte mir nach déi nächste 5-6 Joer beschäftegt sinn.
- Elo waar , kurz virun der Rentrée, définitiv de Rideau gefall fir d'Scouts-Saison 2019/2020.
- No em déi 150 normale Versammlung mat de Kanner a Jugendlechen aus alle 6 Branchene, no mindestens 6 Grupperéit an enger Partie Virbereedungs - a Planungs Réuniounen vun de Cheffen vun den eenzelne Branchene an de 35 Wochen baussen de Vakansen, déi eng Saison ausmaachen, war elo nach e wéineg Zeit, Hiem a Foullard ze léften , an e wéineg Distanz ze gewinnen, fir d'Batterien fir eng nei Saison nees ze lueden.